

何大復先生集

第三册  
卷之九 五言古詩五十四首  
卷之十 五言古詩五十五首  
卷之十一 七言歌行三十一首  
卷之十二 七言歌行三十八首  
卷之十三 七言歌行三十六首

特別  
A16  
1268  
3





和16  
1268  
9

何大復先生集卷之九



五言古詩五十四首

水營墅治田圃種樹

樵隱安於山農隱樂耕畔由來事不同各以性所玩  
倚扉憇南岡一作園負杖行春岸時澤冒原隰遠水增  
波瀾方塘菰蒲暎迴渚鳧鷖亂插柳期息陰列竹莫  
成竿綠坡引行條依墉植頽幹築堤屏焚穢激流代





携灌踈慵外經濟卑賤鮮憂患諒懷原生恥庶悟孔  
父嘆汲古綴遺言欣焉秉柔翰

與賈郡博宿夜話

世故相糾纏人生劇如繫予方值憂艱子亦念淹滯  
邂逅胡不頻茲歲忽將逝蒼蒼季冬夕悄悄昆虫閉  
積雪委沙曲迴風薄林際繁星爛高寒明月皓初霽  
聞雞起中夜捫虱談當世蕭條時事危寂寞古人計  
天地悲瘡痍江湖愧經濟懷哉式微詩浩然出雙涕

除夕述哀四首

世事相倚伏日月更代謝百年能幾時一歲祇今夜  
逝者豈復迴有生無不化慘惻孤燈前悲啼數行下

二

別離今幾何墓樹亦已青徒褰素帷泣奈此元室扃  
古城積陰雪虛牖臨寒星歲暮興慨念愁立空屏營

三

去年值今夕庭闈奉顏色今年值今夕空奠几筵側  
蒼苔翳幽隧翠柏開靈域顧望西山陰風雲為悽惻

四



憂人不能寐起踐中夜霜城笳絕仍響室燈慘不光  
所親半重泉有姊各一鄉附書與鴻鵠歲晚路更長

贈別孟望之四首

束髮事交結白首以為期以茲女蘿質託彼青松枝  
重聚故鄉園殷勤慰我私忽復遠行邁况值秋風時  
我有一罇酒送君瀕水涯酒酣思無極臨歧理桐絲  
誰知商苦一彈一生悲

二

迢迢望曩口肅肅戒僕夫金飈吹明星行李已屆途

親戚各相送萬里在斯瀕嗒嗒中林鳥日出相嗚呼  
人生各有役安能長相娛

三

仲秋物色慘遊子生離顏朝辭義陽陌夕宿武勝關  
遙望武昌路漢水何潺湲願為比翼鳥逸翮杳難攀  
願言終令德努力濟時艱同心苟不虧豈在離并間

四

公子事遠遊離別無復云丈夫萬里志焉能戀故群  
我有千金劍經天決浮雲龍光久未試姑以持贈君



願言終永佩勿令埋塵氛

遊西山二首

清晨命予駕飄遙遠遊邁願言歷嶇嶽况此春華在  
林條紛可結石秀行當采道逢諧俗士謂子爾何隘  
人命未可期河清詎能待縱羽思山林潛鱗慕江海  
富貴人所欲吾志不可改

二

鬱鬱西山岑遙遙山上阪俯觀清澗流仰覩白雲返  
處世亦何促誰能遂仰偃夷齊歸首陽黃綺在商巘

此道久不復斯人苦難挽振衣謝塵塗吾駕日已遠

元日言志

北杓建寅月東谷竦首旦氣轉青陽曖日暎丹霞爛  
群物欣向榮萬象脩改觀自予脫朝簪及茲謝塵幹  
世事鑿倚伏節候感迴換巖耕慕長往淵綸恣永玩  
俯羨潛波鱗仰慙薄霄翰欽此無悶言忘彼高飛嘆  
勉懷日新志庶以慰朝盱

觀春雪

騰空布柔雲蕩日溢繁吹素雪千里來飄揚九衢內



積陰改元節新陽獻青歲永辭寒卉寂甘並春華媚  
繽紛散廣陌晶耀敞塵界既隨游霰集復與流飈會  
臨牖玩靡足陟檻望逾邁參差百覺接翠光層臺對  
佳人御櫺軒上客倚飛蓋旖旎結華纓離縱飄素帶  
郢中有希倡陽阿豈恒態君胡慕高卧沉冥獨無類  
仲春雨霽出遊郊麓覽物叙懷興言自歌四首

二

旬陰豁初霽臨眺城西洲泱泱松上溜潺潺石間流  
積霖晦平陸春雲彌崇丘眷彼農人談寫我終歲憂

三

崔巍南山郭宛彼沙上道荷篠赴脩垵采萍涉流潦  
懷賢顧已後適已每不早緬茲山中人含念鬱中抱

四

幽人久見招解薜俟中林山行巖光暝水息霞氣陰  
隨行委流止萬物觀浮沈達人貴忘我奚用存知音

贈梁宗烈二首



九後集 卷之九 五  
珊瑚產南海翡翠生炎洲豐林多異幹石璞皆良瓌  
瑰材植遐域萬寶聚巖幽豈無千金買亦有萬斛舟  
此物匪為易惜哉不見收玉英匿龍淵黃金沈濁流  
輝瑩久已闕未蒙知己求徒歸匠者愆用負和氏羞  
謹子握中璧時哉毋闇投

二

飄風頃刻至征雲萬里游與子非風雲欲邁良無由  
川塗限山海音問邈中州升高望廣域極眺滄溟流  
浮煙隱榛樹白日蔽岑邱飛鴻不我顧逝鵠不我留

寧無輕舟志浩渺安可求桂樹茂炎隩芝草翻靈洲  
獨處慕朋侶攀贈誰為酬倘荷衷眷言慰此平生憂

贈王文熙四首 以下京集

空堂夕燈明離思漫浩浩冷冷朱絲絃聽我別鶴操  
出門難久留各言慎所好江湖迥且深鴻鴈幾時到

二

行子夜中起月沒星尚爛天明出城去暮薄長河岸  
草際人獨歸煙中鳥初散解纜忽以遙川光夕凌亂

三



光風轉柳枝宛宛路之傷濛濛苑中花朝日耀其英  
停車欲有贈攀條折春芳春芳已消歇但使故意長

四

息馬中林樹煙靄何氛氲遲遲仲春日叢薄華且芬  
上有單飛翼哀鳴振層雲冉冉征途客踟躕不忍聞  
嗟哉彼何物日夜求其群

惲功甫悼亡二首

捐棄不待年幽魂渺仙嶠庭下孤鳴鸞懸鏡恥自照  
帳冷凝素塵惓虛耿熠燿平生白頭吟空然發悲調

二

芙蓉望秋零幽蘭歇芳早不作雙頭花翻為斷腸草  
戚戚懷所思悠悠感衷抱睠茲白髮心窮年以相保

悼亡三首

冬夜一何長展轉難及晨念彼重泉下杳杳隔千春  
中閨月皎皎紈素委流塵馳光安可追往者無復陳  
悽悽向隅泣無乃女子仁丈夫自有志忍哭虞傷神  
沈思結中抱恨恨不能申

二



鳴雞報早朝出戶履晨霜仰視東方星三五不成行  
念子當此時燈前理衣裳恍然失所在零淚空湯滂

三

皎皎機中絹拂拭明如雪裁為雙中衣羅帶紛綰結  
親持向我前與我言結髮豈足佩下體聊以奉娛悅  
執此百年心嘆息一朝絕人故物自留欲視不忍歎  
藏之篋笥中餘香日以歇

挽葉進士

矯矯松栢枝在彼邱中阿上盤青雲端蒼翠鬱嵒峩

惜哉千尺榦嚴霜摧其柯本為大厦用不竟當如何

贈李獻吉三首

西方有佳士於世寡所諧橫風整脩翰倏忽超九達  
天門限重關屢扣闕者辭濟濟列仙子冠裳競追隨  
青雲蔽閭闔仰視何逶迤皎日匿西陸馳光難遽回  
世無魯陽子坐惜朱顏衰

二

東風吹我衣白日何杲杲整駕出郭門脩塗浩橫潦  
登山采幽蘭日暮不盈抱采之欲何為遺我平生好



豈無艷陽花言子好香草丈夫有本性安得不自保  
寸心苟弗移可以鑒穹昊

三

烈女守閨室憂日懷寸陰橫琴寫妙曲繁商激陽林  
悠悠行路子誰為識其音人生處世間貴在相知心  
所以采薇士甘餓西山岑

答獻吉二首

鬱鬱雙鳳闕翩翩飛雲間我皇乘六龍平明開九  
關下有敢死士批鱗犯其顏白日運蒼昊薄暮浮雲

還一朝啓光耀忠誠良可宣

二

吾君古堯舜垂袞蓬萊宮止輦受群善小大必有容  
緬懷燕鄒子悲號訴蒼穹彼蒼亦何神五月飛霜風  
至誠變金石何懼不感通

遊魯山城南舍二首

倚彼方外客逍遙城南野初夏苗始盛荷笠事田圃  
地僻寡隣舍彌旬絕車馬紅葵生井上青榆蔭堂下  
前岡後有岑原澤何膺膺清風林下酌狼藉列樽俎



六律集 卷之九  
翻思在朝市役役徒勞苦

二

溪行日亭午暑氣稍見侵脫巾坐芳草前有嘉樹林  
白雲澹清景綠葉垂繁陰喜無鳴蟬聒幸有好鳥吟  
久厭區中緣撫茲意彌深浩歌答良友聊用開吾襟

中秋十七夜留康德酒飲二首

飄風會浮雲白曜奄西藏羈人惜短晷眷此秋夜長  
長夜無與晤所懷浩難忘君子枉光駕嫵婉情未央  
披軒待流月展轉錯華觴臨觴慄不御對景久徬徨

鬱霧曖庭陰黯黯如降霜流波委頽魄茲歲漸以更  
消長互相謝盛滿安可常勗哉君子心謙謙道彌光

二

客心悲夕陰相顧增煩憂麾杯浩歌起欲去不可留  
屏營獨撫膺仰觀熠燿流倏焉四字豁衆星爛以稠  
游氣降大谷浮颺扇清秋昊天舒華魄銜耀西南樓  
朱門歇笙竽綺陌車馬休嗟爾晨明月燭燭安所求

詠懷十首

北陸無淹晷歲邁陰已長攝衣起中夜凜凜悲嚴霜



明月飄高隅繁宿縱以橫徘徊仰天漢惋彼參與商  
形影永乖隔萬里徒相望

二

烈炎灼崑岡乃辨金石堅金石有恒性銷鑠詎能遷  
薪樗莫傷桂刈蕭母及蘭薰猶不同器清濁本殊源  
君覩高翔翼卑棲非所安

三

英英園中槿朱榮媚朝陽朝陽倏西墮朗月借其光  
馳輝難久耀華隕不再揚番番白馬郎皎皎青樓娼

容好豈足恃相要在衷腸

四

積薪以待燔畜裘以御冬為物貴及時餘者安足庸  
金張藉地勢衛霍承華封馮生守窮巷白首不見容  
賤者日屯邇貴者日以崇邈彼天上京玉宮闈九重  
高高不可測欲往將何從

五

知鳥去惡木螻蟻戀腐莖復隍啟危滿為山忌將成  
泛觀瀛海內巨細各有情哲夫炳身後昧者營其生



千金買一壺為豫當及早江湖多風濤舟楫不可保

六

寂寂沅湘流長江上有楓青蕙綠廣隰綠蘅被洲中  
揚舲泝烟沚遥瞻二妃宮二妃何婉孌牽馨振微風  
解珮遺下女將以明我哀光采不易合精誠渺難通  
浮雲蔽江臯白日忽已晚還顧蒼梧原何時翠華返

七

飛鴻遵故渚長鳴有餘哀北地多悲風霜雪日以摧  
靈鳥集君舍君反見疑猜忠信苟不顯殺身亦何為

始知山梁雉欲下仍徘徊

八

長安有綺樓文牕結朱疏俯視千萬甍遥臨十二衢  
樓中彈瑟女容采耀城隅豈無吉士誘失身良為愚  
迴風入總帳倏忽白日徂玉顏易銷鑠不义當何如

九

白露晞朝日苔榮委清秋長風吹野草飛藿不自謀  
猥彼衆多子安知良士憂覆水置平地一散永不收  
鼃錯憂漢室翻為六國仇禍機苟不測談笑生戈矛



留侯信人傑遊從赤松遊

十

白玉本自白蒼蠅亂其真讒言解膠漆况匪平生親  
烈士死道傷貪夫登要津自古皆有然茲恨何當申  
蓬丘眇煙霧貝宮鬱嶙峋列仙如可期吾將躡清塵

東臯

藹藹東臯村中有幽人宅茅堂入空林草徑無來客  
林中桂樹英容采耀月夕寒香有時置秋來望攀折

贈邊子四首

自予辭京邑念子守南服歲序阻歡覲川塗積遐矚  
比鷺方自茲東轅偶相值聯鑣始宋中解纜及河曲

二

同車越梁晉覽歷多古疆紆遲衛流汭轉盼淇水陽  
感來意不淺道故言已長辛勤眷途語愴惻悲別章

三

戎馬暗中原嗟此遠行子遥遥赴城闕戚戚望桑梓  
路阻難可通河清詎能俟俯仰君父間出處良在此

四



懽聚理無恒悲離情有傷况茲征途間詎能久相將  
浮雲興歲暮素雪翳晨光揮手自茲別後期應毋忘

何大復先生集卷之九

何大復先生集卷之十

五言古詩五十五首

贈望之四首

嫋嫋孤生楊迢迢河水汭平生骨肉親婉孌相諧悅  
思心起歡燕何况當乖別浮萍寄清流聚散有歡愒  
與子同枝葉胡為忍離濶愧匪根與株莫能相固結  
德人重行義志士輕訣絕慎子萬里軀慰我長飢渴



二

良時不克俱悠悠子行邁行邁之何方乃在萬里外  
汎舟涉江湘道遠阻湍瀨我心思桂林倚之增歎嘅  
河清豈無期奈此日月逝所願芳未歇及茲采荃蕙

三

瓜生施於葛枝蔓自纏糾念我同胞人是子結髮友  
少小鍾慈育各言常相守出門有羽翼忽爾離隔久  
戚戚去兄弟思我父與母種瓜莫種棘種棘恐傷手  
恩愛苟不虧離隔復何有

四

絕裾不為忍叱馭寧顧危念子奉明君結義良在茲  
雖懷垂堂戒委質我所知白日豈不察浮雲蔽於斯  
孤葵慕太陽傾心量不移勿謂長棄捐終當有返期

送王宗哲少卿

肅肅出郊干行行涉河甸子身被王命駟馬輝雲電  
覽岳停華陰觀都指秦殿思子衛泉流涓澹一以緬  
平生共肝膽何云異鄉縣况我離骨肉子也常眷戀  
憶我連枝樹感子同洲鴈子行四方志努力思見面



出城贈韓子

晨車去遥遥將子城之隅城隅何所有有荷復有蒲  
念當與子別思心立踟躕他人豈無友非子誰為娛  
折荷勿涉水涉水濡子車安得瓊瑤華採掇為子需

過呂仲木宅同呂道夫馬君卿

夏訪呂子居乃在北城陰門臨古墻渠上有高樹林  
展席流南薰開軒睇北岑况諧同心友聽此和鳴禽  
佳人出素帙高詞播名琛亮哉清廟瑟淒其白頭吟  
一彈意不足三歎有餘音因之覽元古寥寥傷我心

鳴蟬

苑苑庭中柳蟬鳴在高柯上有西飛燕下有東流河  
美人堂上坐忘却門前道舉頭見鳴蟬低頭惜芳草

冬至

北杓指元朔南景留嚴冬中衢返羲馭淋氣扇黃鍾  
微陽懼不力固陰密且重 至尊怵時令端拱象欽  
恭閉關過行旅執玉羅勳庸天乃群物祖日為衆陽  
宗眇茲一線晷邈彼九洞龍泰登自此肇復來豈無  
從聖人謹元始君子履攸終



贈田子三首

蓬途眷行旅綢繆永茲夕之子溯大江方舟自此適  
藹藹皇邑遊鳴鑣並京陌同袍四五人君為遠行客  
婉孌一室內安知形影隔人生重貞固豈必金與石  
念彼膠漆友喟然感今昔

二

蒼蒼季冬夕積雪委中衢三星出東戶纖月揚西隅  
主人樂行觴衆賓且停車何況平生友夙昔共歡娛  
慘惻高堂上為子重踟躕山川緬以邈岐路在須臾

出門慎自愛慰我恒相於

三

鳳鶩去南國徘徊翔紫庭毛羽紛歲蕤霜雪日以零  
一鳴已曠世奮翅排清真崔巍南山下脩竹何亭亭  
文采忽遐遠佇立望爾形依依北堂隅儔侶念伶俜  
相聚不須更一散如晨星我欲從爾去但愧無脩翎

七夕劉子緯宅次君卿韻

良時屆今夕懽觀諧茲方流飈委芳卉清池激微涼  
仰觀牛女星熒熒河漢傍織遊西隅浮一作雲起



中央合離一以愴明晦古難量繫子場下駒慰我長  
思望

斷絕詞

孔雀慕儔侶回翔恐相失羅雉為雄雌反覆不成匹  
白沙搏清水誰能作膠漆木非骨肉親心志安得一  
牽纏無已時斷絕有終畢

玉岡黔國地

玉岡一精舍五華東國地  
球琳美梁埃篠蕩中  
霜凝戟門寒日上鈴閣書寮惟散琴書緩帶接賓友  
風林清夏簾雲石靜秋牖參差萬琅玕照耀雙瓊玖  
連城價自高傾國貌俱醜繆倚慙薰葭先凋謝蒲柳  
上公勲不忘君子名詎朽蠻夷欽鎮靜風俗化溫厚  
比德亮無瑕抱節誠可久珪璋寡琬琢瑚璉重典守  
至寶天所慳珍產地非偶閭閻顛神仙宅瑤水蛟龍藪  
安知王母觴復為周王壽獻從萬里餘種已千年後  
靈秀萃于茲積累固所有樂只邦家光斯韻播人口

贈君采效何遜作四首



霜空鴈絕響風庭葉罷飛念爾別離日淒然芳歲微  
城隅明星晝曉闌殘月輝不見携手好宵行誰與歸

二

平生寡所諧與子中邂逅讌語殊未厭絃柱促離奏  
目斷川上雲念攢天邊岫河山邈以綿佇立阻懽觀

三

居人日縛束行子逝飄飄山栖憐霧夕水泛悅霞朝  
違俗勢靡合遺名跡自超愧隨衣冠侶振珮青雲靈

四

歲晏客來歸車馬一何亂新粧下機笑白髮倚門看  
未俟春林敷且玩冬花燦閑居有徽音倘付雲中翰

酬贈王德徵

北方有一士雲冠瑤華簪抗身服高義奮翅翔天林  
一鳴遠見斥棄置南海潯飛黃本冀產顧盼無千金  
絕景邁流電豈與泥沙沉邂逅頃三接一言荷知深  
投贈古錦篇宛聆哀王音大雅久寥寂斯文竟誰謀  
皎皎空谷駒生芻勞我心

江畬行



樹穀江上田三年免飢餓富貴苟非道千駟祇一唾  
匹夫不奪志曠士鮮無過蛾眉召讒妬西子蒙詬浣  
鑠金懼衆口懷璧誠賈禍蛇龍蟠泥沙鯤運海水簸  
子今還山中食穀且高卧

詠衣

淒淒締綌風慘慘葛履霜無衣嘆幽奏同袍感秦章  
物微申有贈德音亮難忘新纁託故素温燠念寒涼  
體裁合情志拂拭生輝光雖云異黃裏願言同襲裳

古怨詩五章

隕葉辭舊枝飄塵就岐路遲徊決絕意言念平生故  
泥泥行間泥零零蔓草露豈不畏沾污為子無晨暮

二

抗義一何明結志誓不解對面有背棄何言萬里外  
陟疆朝采葑陟畛暮采菲所重在德音容色安足恃

三

白玉雖光輝瑕疢在其內徒看色笑親詎識肝膽異  
勢奪恩愛移交離讒毀至棄捐豈我傷卑薄乖情義

四



寸心抱貞固投一安有它詎知所同懽散聚倏朝霞  
昔為山上石今為浪中沙孰云無轉移漂蕩令心嗟

五

清晨臨御溝御溝東西流垂楊夾廣路蹊蹠行紫駟  
揮鞭不顧返斗酒誰能留慨焉中道情覆水倘可收

情詩

出門景將夕入門露已灑徘徊雙戶間燦爛三星上  
玉顏豔明魄一別阻弦望詎能輕訣絕徒令重惆悵

詠裘

羔裘故人物投贈何殷勤儉表素絲質光迴錦繡文  
豹祛未稱美狐白安足云意比綿袍戀恩同纈絮温

飲酒

平生多意氣四海盛交遊列筵亘長夜談辯雄名流  
杯酒一言合遽將肝膽投入門顧兒女忸怩但懷羞  
齒年逮今茲世故多所由興言念親戚骨肉嬰我憂  
寒宵寡懽悰濁醑聊自謀明燈耀室內盤蔬代庖羞  
豈必朋與賓妻子前勸酬語笑率真性無嫌亦何尤  
人生貴止足吾志卑公侯數觴已復醉頽然萬情休



寄言馳騫子從今任去留

送劉御史按淮揚諸郡

臺臣今按地

聖祖舊開疆白雲萬里來千載還 帝鄉伊昔草昧  
初血戰塵茫茫一馬渡天塹六龍飛淮揚堯階起二  
尺禹跡遺八荒江海控形勢邦家存紀綱遐哉百年  
餘世變隳其常城社穴狐鼠當途走豺狼君埋都亭  
輪再覩司隸章述職屬茲歲巡狩代我 王泛舟淮  
泗急褰幕風日涼鷹隼在寥濶一擊乘秋霜

遊洪法寺塔園土山

塔園鬱森萃土山莽迴互迹陳慨往躅心賞諧秋晤  
時惟冬氣交零木爽登顧裊裊拾層級盤盤折脩步  
憑危眈倒景俯檻驚流霧空王湧廟衛貴者留墟墓  
三門上岌業玉柱撐雲露白日寶光垂風晝金響度  
徒興雍門哀未暇首邱慮珠藏北邙毀石罅南山錮  
怛焉傷逝心川汜激東騫

贈時亮

戴子有仙癖時荷金門遇辟穀遊人間嗜酒尚 素



白日指五岳笑我不能去爾未生羽翼何時向烟霧

贈子言

張生神駿骨一蹶在衢路雖有萬里才未蒙千金顧  
腰佩白玉環手擲金聲賦堂堂烈士身勿為名所誤

冬夜

膏火含朱光玉樽泛清醴閒房密以靜雪流牕戶裏  
良友不我適室阻悵伊邇異人非我儔聊酌娛妻子

十二月朔日元大駕觀牲

元雲翳廣陌素靄霧層城萬乘屯蘭甸六轡儼天行  
輕飈轉芝蓋重霄揚翠旌玃玃劔珮合鏘鏘龍鳳鳴  
犧人脫衡福膳宰翼房楹牛羊上廩貯鹿豕大庖盈  
馨香流秬鬯肥脂奏牲牲宮闕回帝覽鉦鼓感  
皇情至敬肇茲達大禮湏時成

簡君采

夕會星已羅晝接景將落見面不湏臾何以展契濶  
側耳金玉章音響時聞作假寐晤清顏傾光豈虛託  
枉驂悵雲轡命席恥塵爵徘徊翳雲日佇立抵城郭  
駢居淹晨暮庶俾私心豁



送崔氏四首

行車在門端送賓集城隅轅驥難久停振策中路衢  
盤盤大行谷往念高堂居還顧望西山層阜蔽皇  
都回飈赴迅響飄雲奔長徂昔予背鄉域睠言返田  
廬驅車赴燕薊茲歲淹七踰何因附羽翼翹首南翔  
鳧

二

疇昔衣冠士同遊若雲爛懽讌未及終存亡在轉盼  
亡者長沉埋存者各飄散俯仰天地間念之一惋嘆  
出門送我友言返故鄉縣登高望古疆河衛浩以漫  
山川白日冥匹鳥鳴相亂愴惻懷征途令我腸中斷

三

結髮與君友附驥思一鳴君子揚休景邁世垂榮名  
伊子守屯蹇學宦寡所成握瑜俟知己知己誰為明  
良時展嬾婉之子復遠行衝飈起閭闔浮雲翳太清  
層城羅宮殿躍馬振綏纓長嘯歌五噫投策出漢京  
慨念古人士去之一何輕終焉從子逝富貴非我營

四



六復集 卷之十  
飄飄山上葛纍纍田中瓠苟非同根蒂纏綿安得固  
人情易反復結交有新故嗟哉夙昔好乖棄在中路  
明珠倘無因按劍不我顧深言匪由衷白首為所誤  
亮君曷恒德永副平生慕

寄贈王子衡四章

昔餞邁伊始今懷緬猶故城憇屢淹薄舟遊一汭溯  
弭節指頽景搖車首東路倉皇抗手別邈絕賞心晤

二

賞心睽景光川汜渺徂征竄身窮海上卧痾天邊城

傾歌島岸拆蹙沓波樓驚飄音承來訊頗叙樓泊情

三

樓泊倦淮堧量移逐山郭沈迷謝簿領褰開盡巖壘  
雲翔葉縣鳧風唳華亭鶴果諧宣城興復枉臨海作

四

臨海疊靈巘洞壑丹霞林名勝紀圖牒仙聖秘幽深  
俗營迂微尚曠懷俟同心倘追凌風步滅響升雲岑

集吳子寺館

首夏憇祗園遊息解冠簪愔楹抗疏敞殿宇闕深沉



綠竹帶陰渠丹葩綴陽林既枉高人躅亦協靜者心  
琴書散煩慮鐘磬發幽音清言忘朝晷元思超古今

夏夜薛子宅

飄風激踈幄飛雨散高庭白雲蔭華月青天垂列星  
褰裳望西苑園樹發青熒陰館辟炎埃峻檻臨巖壑  
冷冷朱夏井肅肅元夜局披霧聆霏談逍遙暢神形  
遊心娛竹素此樂誠可經

贈君采

蕭散綜琴書疲疾謝回亂清雲汎闌暑一作蘭渚白水激

文瀾於心懷我友翩翩振詞翰比室諧言晤撫景慨  
流翫孔公讚龍夔莊生明吹萬理感由神詣情賞非  
虛嘆鄙哉辨雌霓安知覩河漢願投忘形契去適無  
窮岸

高橋以下秦集

飛梁何裊裊裊裊飛澗中窈窕入青靄蜿蜒垂白虹  
俯壑聆迅湍攀崖挹迴風闌干既重複結構亦玲瓏  
穿石鑿坤艮架閣憑虛空羽填烏鵲岸力坼龜鼉宮  
設險固天造扶神豈人工聖代文軌一絕域賓王同



梯航無外至筐篚倏然通懷哉絕棧智逝矣當關雄  
欽誠慕在德其亡守無窮

姜子嶺至三岔

出嶺上雲霓入谿下烟嵐高高不可極杳杳詎能探  
朱崖秀夏木石壁映寒潭千林覽葱蒨百丈窺澄涵  
崩奔谷響赴隱曜川光含登陟力不辭險阻情已諳  
潛澗羨垂綸越巘思停驂振策岷峨西揚帆江漢南  
臨深匪忘懼履坦但懷慙

青石崖棧

側行青石棧誰能久延竚斷板連曳雲噴泉灑飛雨  
迅流西回激峻坂東折屢隕岸互傾歎危梁裊撐柱  
飲猿馱游鱗立馬接翔羽慎爾千金軀永念垂堂語

寄粹夫四首

伊昔京室娛安知岐路戚君就河內棲予從關西役  
同源異流止撫事乖心跡終爾返輪鞅音塵慰岑寂

二

肥遯世久欽苦節晚逾峻懸蘿邈莫攀翠躡迫千仞  
真心道與超晦迹名反近將遂諧龍夔混然保貞順



三

昔聞孫登嘯千載識其音  
峇嶺百門上髣髴三湖陰  
鴻舉已寥廓鸞響猶空林  
曠哉既往古契此徵於今

四

阮公雖曠達于道未真見  
石髓不可餐赤文詎能辨  
服理昧情性眩物矜神誕  
儻君示中行遙垂大人撰

何大復先生集卷之十

何大復先生集卷之十一

七言歌行三十一首

乞巧行 以下使集

鵲橋崔魏河宛轉織女牽  
牛夜相見岳陽女兒迎  
七夕乞巧樓高高百尺華  
燈明月光窈窕結綵蟠花  
綺羅繞富家女兒恃嬌小  
年年乞巧不得巧貧家女  
巧世所稀只為他人縫嫁  
衣湏臾露濕金剪刀雙星  
漸



大後集 卷十一  
沒河漸高人間天上兩迢遙步襪仙裙空寂寥君不見古來巧拙何足語歲歲樓前競兒女

古松行

岳州地多古松樹千株萬株植官路故老猶能記歲  
年行人不解知朝暮臨江西來烟霧起來谷連山一  
百里黛色寒通七澤雲秋聲夜捲三江水郡城之北  
江水東鄂王祠廟丹青空英雄為謨本宏遠古木至  
今多烈風忠魂義魄杳何在故物依然見遺愛繁枝  
百世人不剪直氣千尋我當拜六年前過蒲圻城古

松陰中三日行空山倒掛雷雨黑盛夏常貯炎風清  
郵亭傳舍總蕭瑟鬱抱煩襟亦飄逸迴巖峭壁奔洪  
濤老蔓長藤翻白日只今復向巴丘道野草漸多松  
漸少仄徑孤根半蝕苔夕陽幾樹空垂蔦昔時所見  
合抱材斷枝落葉隨蒿萊過客山中想清籟行徒道  
上愁黃埃輦山輿嶺萬千重半作豪家樓上棟古人  
之力今人勞大厦明堂不得用年年官吏催斧斤故  
老雖怒那敢嗔傷枝出地子成樹野婦山樵摧作薪  
驛前數幹聊可數我忽見之再三撫霜皮露甲如虬



蟠霧鬣烟鬟學龍舞陰森氣象凜猶昔翠色長標不  
可侮荒林曠野識者稀終為誰家起廊廡回首鄂廟  
秋山阿廟前之樹無高柯鬼神訶護亦徒爾英靈不  
返將如何達人且勿怨搖落志士胡為傷轆軻君看  
世事盡如此拔劍聽我松前歌

津市打魚歌

大船戕戕繫江岸鮎魚鱖鱖收百萬小船取速不取  
多往來拋網如擲梭野人無船住水滸織竹為梁數  
如罟夜來水長沒沙背津市家家有魚賣江邊酒樓  
燕估客割髻砍鱸不論百楚姬玉手揮霜刀雪花錯  
落金盤高鄰家思婦清晨起買得蘭江一雙鯉徒徒  
紅尾三尺長操刀具案不忍傷呼童放鯉漈波去寄  
我素書向郎處

偏橋行

城頭日出一丈五偏橋長官來擊鼓山南野苗聚如  
雨飢向民家食生牯三尺竹箭七尺弩朝出射人夜  
射虎砦中無房心無堵男解蠻歌女解舞千人萬人  
為一戶殺血祈神暗乞蠱沙蒸水毒草根苦上山下



大復集 卷十一 三  
山那敢敷蠹爾苗民爾母侮虞庭兩階列干羽

省中公讌

今日何日公讌會紫微垣下填車蓋揔戎太監爭邀  
呼御史中丞立相待坐花饌玉綺席陳愧我何能居  
上賓勸酬盡是文武士列坐俱為藩臬臣廣堂潭潭  
長百武堂前撾鐘復搥鼓擊石彈絲逐橫吹清歌緩  
節隨輕舞酒闌起酌明燭前橫金鳴玉聲珊珊交衢  
夾道燈火亂仰看月出樓臺間諸公豪俊世希有協  
恭同寅重邊守幸時夷方不用兵簿書之暇得飲酒  
只今 天子布洪仁九州四海俱同春清風想見唐  
虞出玉座欣瞻日月新諸公於此復何慮矢志盟心  
思致身

盤江行

四山壁立色如赭盤江橫流絕壁下驚濤赴壑奔萬  
牛峻坂懸空容一馬危叢古樹何陰森尋常行客誰  
敢臨徭婦清晨出深洞虎辟白晝行空林沉潭之西  
多巨石短棹輕舟安可適日光射壁蠻烟黃雨氣蒸  
江瘴波赤土人行泣向我云此地前年曾敗軍守臣



祇知需貨利將士欲苟圖功勲英雄謨策自有術竄  
婦奸男何足論營中鼓角連雲起陣前臨山後臨水  
烹龍釀酒日酣樂傳箭遺弓尚驚喜戰馬俱為山下  
塵征夫盡向江中死遂令狐豕成其雄屠邊下砦轉  
相攻千家萬家雞犬盡十城五城烟火空夕陽愁向  
盤江道黃蒿離離白骨槁魂入秋空結怨雲血染春  
原長冤草只今夷虜來歸王高墩短塹俱已荒牧童  
驅羊上塋塚田父牽牛耕戰場惟有行人行嘆息聞  
說盤江淚沾臆

大石關行

青山千仞城百尺雲中差我列萬石關門控險鐵不  
如萬人可望不可踰蠻兵一朝殺關吏驅馬入關履  
平地山頭矛戟多於草弩箭射甲如射縞當關祇用  
一夫力胡為萬卒猶難保君不見山上城堞毀樓傾  
四壁立青狸蒼兕朝對啼白蒿黃雲暮愁入

栖鳳亭為黔國賦

將軍園中何所蓄十尺亭子四面竹亭中一榻千卷  
書將軍晝遊夜還宿元勳甲第高入雲奇珍異玩窮



海陸將軍雅性不苟嗜只愛亭邊萬竿綠舊家風節  
傳累世見此勝如見喬木根株盤據幾十年出地皆  
成老龍骨舊幹扶踈已作林新梢復見高於屋新梢  
舊幹森相向百丈空雲寒突云先公開圃一何勤引  
水分畦費營築石間斲雨移紫瓊沙上耕煙長青玉  
至今遺愛思萊公萬古看詩想淇澳將軍能武兼能  
文展卷一目數行讀只今世守清白操春風如溫霜  
如肅閑時高卧園之中此君亭亭對幽獨月軒夜坐  
呈夏簟風榭涼憑除暑服空冥縹緲聞笙竽戶牖清

虛映籤軸崑池歌動黃鵠高洞庭笛橫白雲哭瑤瑟  
一鼓瀟湘亭水綃再寫質管谷憶昨路經嶺徼來佳  
植全稀多樸遶山深苦竹啼鷓鴣地僻枯篁宿麋鹿  
何期得到將軍園一洗胸中十年俗清晨邀我促席  
看半日捲簾猶不足我聞竹生玉河湄開花結實鳳  
凰啄將軍文采真鳳凰凡樹安能動高目願將音響  
入簫韶奏我亭中棲鳳曲

黃陵廟

黃陵峽中灘水多黃陵廟下難經過我我巨舸牽百



丈櫓折檣摧不得上江風蕭颯笳鼓哀廟門遙向楓  
林開往來落帆泊江口俎牲呪神醪神酒南船下峽  
疾如箭岸草汀花看不見巉巖亂石撐如麻雲間濁  
浪迷三巴千里舟中坐超忽回首天西斷心骨

關索嶺

噫嘻吁嶮巖何天設之危艱下有奔雷歎雪之飛聲  
上有懸崖石棧百折而造天欽崙兮巉巖回復兮盤  
盤行人鴈陳而魚貫計分寸兮躋攀飛鳥兮折翼猴  
孫兮無援苟失足殞巖而落箐兮曾不足以充虎蛇  
之餐朝不見日夕不見月雲烟慘慘兮晝夜寒噫嘻  
乎何天設之危艱我来倚絕壁而長望蓋不知蜀道  
之為難

大梁行 以下家集

朝登古城口夕藉古城草日落獨見長河流塵起遙  
觀大梁道大梁自古號名區富貴繁華代不殊高樓  
歌舞三千戶夾道烟花十二衢合沓輪駟交紕陌鳴  
鐘暮入王侯宅紅粧不讓掌中人珠履皆為門下客  
片言立賜萬黃金一笑還酬雙白璧帶甲連營殺氣



九後集 卷十一  
寒君王推轂將登壇彎弧自信成功易拔劍那知報  
怨難已見今符連楚越更聞飛檄救邯鄲一朝運去  
同衰賤意氣雄豪似驚電楊花飛入侯嬴館草色淒  
迷魏王殿萬騎千乘空雲屯綺構朱甍不復存夜雨  
人歸朱亥里秋風客散信陵門川原百代重回首宋  
寢隋宮亦何有遊康時銜內苑花行人尚折繁臺柳  
繁臺下接古城西春深桃李自成蹊朝來忽見東風  
起薄暮飛花滿故堤

蔡州行

蔡州城高高且壯四十年間兵不向旌旗忽乘雨雪  
入一夜開門納兵仗請降盡是泗曲軍拒戰不覩牙  
城將韃橐將軍拜道左緋衣小兒來天上州人始識  
裴丞相

流螢篇

廣儲六月清無暑流螢暗逐薰風舉始見昏連萬戶  
星更看夜照千門雨千門萬戶競高低拂檻縈廊亂  
復齊碧莎暎水光初迥綠柳棲煙影乍迷水光烟影  
飛還歇肯使炎精易淪滅帶火終須避太陽含輝却



自親流月長信宮中一葉秋玉階金閣見螢流貴嬪  
羅扇開香篋侍女珠簾捲畫樓誰家怨婦縫縑素當  
牕忽見流螢度蟋蟀床空寶瑟寒鴛鴦機暗孤燈暮  
螢飛螢度自年年却笑明珠按劍前莫言腐草無生  
意莫道寒灰不再然還將斥鷃鷓鴣語三復莊生第  
一篇

觀漲

五月十日雨如射西山諸溪水皆下大陸朝迷牛馬  
群疾雷夜破蛟龍鑿洪濤冥冥夕風急白浪閃閃山  
水亞浮波噴沫來崔巍巨丘欲沒高岸頽咫尺莫辨  
天宇濶倉卒但憂坤軸摧固知一葦不可濟雖有萬  
弩何由迴農家夜起築隄障婦女走觀色沮喪惡少  
迎人爭渡喧父老携幼登城望門前祗訝海勢翻井  
中暗覺潮聲上憶昨曾為萬里行洞庭灩澦何渺冥  
鯨吞鰲橫那可測盤渦駭浪誰能平只今夢寐時作  
惡聞此終夜令心驚旋看雨霽勢亦止沙嘴忽落千  
尺水雜花濛濛夏塢靜細草青青夕洲靡行人褰裳  
掇菱苳稚子垂竿取魴鯉眼前喜愕俱已忘就中消



九德集 卷十一  
息誰為此

寄贈張方伯

君侯風神有奇格秀髯方瞳兼廣額少年甲第已崢嶸  
嶸壯歲功名更輝赫長淮之西古蔡州我侯清風千載  
流行人尚聞歌赫度童子猶思迎細侯出叅方岳聲雷  
動復道中州又棲鳳大省才賢豈易推巨卿名位由來  
重黃河清洛靜風埃少室喬嵩雲霧開行見虞廷浴岳  
典共看商室濟川材憶昔別公汝水上太行雨來隔千  
嶂抱病還依故里居有懷空向夷門望夷門道接大  
梁東車輪日日度春風道傍為問南來使早晚朝端召  
寇公

木槿花歌

朝見花開暮見落人生反覆亦相若夜來白露洒園  
藿已是繁華不如明朝花枝上鬪綽約暮花辭枝竟  
何託持花為謝青樓女鏡裡容華不待汝

聽琴篇

美人橫琴坐我堂酒闌為鼓三四行燈孤月明客不  
寐絃悲調急秋夜長吾家瑤琴久不拭金徽玉軫無



九後集 卷十一  
顏色感君對此如有情一彈使我三嘆息樵歌響若  
山澗幽楚歌慷慨雲夜愁瀟湘猗蘭稍平逸四座但  
覺清商流始聞白雪停翠竹烈飈吹我溪上屋忽然  
翻作廣寒遊知是霓裳羽衣曲含宮移羽何春容冷  
冷萬壑吟風松烟岑一夕怨鳴鶴江天何處驚蟠龍  
我初好音惟好此橫笛短簫徒聒耳平生頗抱鍾期  
懷四海難逢伯牙子今夕何夕願不違為君擊節淚  
沾衣高歌雅和人世稀河轉參橫君莫歸

懷三吉士

黃河西來走蜿蜒睢漳之水相蕩泊火室王屋俱崢  
嶸太行林慮朝中岳含靈萃異幾百年中產三士誠  
磊落神標秀骨自殊衆水之文蛟山之鶴十年戢鱗  
在煙海一日比翼棲雲閣蔡君通朗及衆藝馬氏多  
才步前作昂藏崔子抱群經徑操巨舸從伊洛文昌  
鬱鬱高中天出入彼此同輝燿玉京神仙皆有侶茅  
齋野人少相託平生契誼懷數公眼底安得常相樂  
眼底安得常相樂聯牀並轡今如昨

觀打魚用東坡韻



大魚跳波如擲塊溪日溶溶照金背小魚响沫沿岸  
行潛向沙邊翻荇蒂家僮舉網欣得鮮持向庖丁割  
為鱠磁甕始見紅尾搖霜刃旋看錦鱗碎我雖愛此  
不忍食悔不先教放溪瀨自愛含生天地間寧知失  
意波濤外嗟哉小物尚有然人間得喪誰能會君不  
見鯤與鯨釣者持綸空爾思倏忽乘雲下滄海

孤鴈篇

孤鴈北來來幾時窮冬無侶鳴聲悲雲長路渺去安  
極日暮天寒飛更遲洞庭瀟湘落秋水苦竹黃蘆一  
千里清怨時從鳴笛生斷行暮逐哀箏起塵沙關塞  
愁轉蓬隨風且落江湖中微軀幸免庖人俎短翮長  
辭獵士弓君不見隴山鸚鵡解人語一生自恨黃金  
籠

北風行

古申城邊秋風落北風慘慘夜復作元冬烟霧卷寒  
沙白晝雷霆出陰壑寒沙陰壑晝難開萬里悲風何  
壯哉高空落木下不止長路斷蓬吹更迴嚴威著地  
坤維裂鷹隼入谷龍蛇結寒雲凍月光杳冥荒臺古



林氣慄冽郭西村舍雖近城蕭條盡日無人行門前  
但聞衰柳折墻外祗聽枯桑鳴鄰翁歲暮缺衣褐茅  
屋欹斜用繩縛塵生釜甑暗不掃寒入肌膚利如割  
堂上書生感歲侵臨風三嘆不成吟暮花飄揚不可  
見病葉憔悴傷人心出門黯淡天無色衝飈四來山  
為黑黃河欲渡波浪陰滄海無梁星斗仄嚴霜大雪  
來幾時歲蕤朱鳳號南極

雨夕行

城頭雨脚黑不斷堦下凍潦流已滿出門咫尺無所  
適積霧連雲接平坂城中佳人沈與趙我忽思之費  
招挽趙子閉門卧不出沈生衝泥來獨晚臨階下馬  
入我堂琅琅高詠不可忘瑤徽浮塵為我拭磁甕濁  
酒為我嘗西鄰彭生亦豪士四壁風雨卧一床隔墻  
深夜呼即至三人團坐傾壺觴須臾簷雨亂沾席牕  
風蕭蕭動煙柏照夜青缸寒向人促曙紅鑪暖留客  
請君再歌我擊節晨雞已下西城陌嗚呼人生歡樂  
難再來古人滿眼俱塵埃何況與子異鄉域此地相  
逢能幾迴



白雪篇

元飈作雪龍沙窟萬里吹花度南麓千門九衢堆已  
遍翠崖丹壑沾應足曙輝寒素積崔巍中天照耀瓊  
瑤臺羲和不知六龍在仙人遥乘萬鶴來依樓傷檻  
墜深院輕羅白紵誰曾見已將弱舞鬪迴風未遣明  
姿讓流霰城中車馬不動塵党家金帳暖圍春豈知  
窮巷衡門裏一作無有當時高卧人

雨雪呈望之

北風蕭蕭天雨雪洪川大陸冰嶙峋城闔咫尺不可

越念子鬱鬱傷我神十年骨肉更知己四海兄弟今  
何人夫子風流本絕世致身况在萬里津頃聆清辭  
叩哀玉復睹高價收名珍愚弟病歸卧丘壑山中日  
與蓬蒿親喜看結駟來天上又許題詩到水濱嗟哉  
十日不一見眼底盛會真難頻茅簷白日苦太短祇  
有長夜堪留賓瓦鑪木檠亦不惡梅花栢葉俱鮮新  
只須對此共歌笑莫使離別成逡巡

寶劍篇

戴仲鷗將赴春官來別何子何子作寶劍篇贈之



其辭曰

我有雙龍之寶劍重之不减雙吳鈎雄遊九天橫素  
秋鳴鳴匣中聲啁啾扶風豪士邯鄲俠千金在傷不  
敢酬雪花星文照玉玦贈汝慰我心所求汝今年纔  
二十四北上長安見天子手翳鳳凰跨騏驎肝膽  
義氣無與比杏花江頭春風起綠袍青綬帶秋水想  
見提携白日前更看結佩青雲裏我初鑄此良已勞  
昆吾鐵冶風雷號寶銷玉珥黃金錯何以繫之赤錦  
絛砍地翻虞滄溟倒倚天未覺虹蜺高十年在匣尚

未試嘗恐棄置成鉛刀君不見豐城紫氛埋古獄星  
辰夜搖颺颺哭竒器逢人自有時肯使塵沙竟湮沒  
又不見藍田寶山空突兀頑石却指神鋒禿平生雖  
有百煉鋼一用不謹為棄物吁嗟戴生爾無忽

寄王職方

故人王郎天上客一歲寄書凡兩束山中病夫儔侶  
稀念子不見心轉鬱長淮浪高河無梁我無羽翼到  
爾傍京師南來四千里春鴻秋鴈每相望

一作莫相忘

寄李空同



九後集 卷十一  
五  
黃河臘月冰十丈縱有鯉魚那得上楚天鴻雁避霜  
雪未得逢春難北向康王城邊沙草曛梁王臺上多  
暮雲野人歲晚誰相對桐栢山中空憶君

歲晏行

舊歲已晏新歲逼山城雪飛北風烈徭夫河邊行且  
哭沙寒水冰凍傷骨長官叫號吏馳突府帖連催築  
河卒一年徵求不少蠲貧家賣男富賣田白金縱有  
非地產一兩已值千銅錢往時人家有儲粟今歲人  
家飯不足饑鶴翻飛不畏人老鴉鳴噪日近屋生男  
長成娶比鄰生女落地思嫁人官家私家各有務百  
歲豈止療一身近聞狐兔亦徵及列網持矰徧山域  
野人知田不知獵蓬矢桑弓射不得嗟吁今昔豈異  
情昔時新年歌滿城明朝亦是新年到北舍東鄰聞  
哭聲

嫦娥圖

月宮絳絳冷光射桂樹長生花不謝玉宇瓊樓閉早  
秋金蟾銀兔啼寒夜夜寒露下步瑤臺羅襪仙裙冉  
冉來屏障乍開雲母隔簾櫳遙望水精開明星迢迢



斜銀漢誰擬丰神傳素練霓裳羽衣世莫聞霧鬢雪  
貌人難見靈藥空疑后羿妻吹簫跨鶴幾人迷君欲  
遨遊廣寒殿直攀萬丈青雲梯

胡生行

近時逢人論術數胡生相法稱獨步閉戶時看人相  
篇然燈夜讀石室賦吾觀此術非荒唐異人歷代各  
有長我朝名家亦不少神妙無過袁柳莊君學本從  
袁氏出識鑒至今如畫一為客十年九幾更閱人四  
海無一失初從燕市度生涯一日聲譽傳京華衣冠

每動公卿座車馬爭迎貴戚家自從仗劍離燕城  
時朝士無相識已往豪華不可論只今形貌猶舊  
漂泊江湖不自伸袖中書在半埃塵窮途反遭俗眼  
士才心難逢好事人昔聞燕邸招藝匠袁生抱術金  
門上 文皇自有天子鬚群臣盡是封侯相君臣于  
載當一時雅鑒風神猶在茲才殊未可尋常得數偶  
還教際會竒古來相心不相體眼前貧賤那能擬志  
士翻居草澤中貴人多在塵埃裏胡生謂我顏色竒  
顧我已是雲壑姿希夷不識錢若水麻衣道士應當



知

袁惟武山水圖

源潭窈窕開層島，疊嶺撐空互傾倒。人家萬樹隔村  
涼，細雨冥冥春更好。清江柴扉映春草，樵歌漁唱歸  
林早。帆色遙隨返照迴，岸沙却被垂楊掃。袁侯此圖  
愛藏護，畫手莫識馬與顧。掛壁盤紆見巖壑，開牕拂  
拭生雲霧。嗚呼！此圖侯當珍重留，壁間萬金莫買真。

江山

何大復先生集卷十一

何大復先生集卷之十二

七言歌行三十八首

歸來篇

君不見陶公飲酒負奇氣，平生下筆五千字，不肯上  
書干明主。安能束帶見小吏，歸來不願千頃田，但須  
囊中有酒錢。男兒委身事權貴，摧眉折腰誠可憐。朱  
君雄豪氣如虎，風期直與陶公伍。青袍銀帶不復視，



壯年棄官如棄土雅性好酒兼好文眼中富貴豈足  
論五花換酒召賓客千金買書遺子孫人生百歲終  
蕭索如子從容胡不樂未似原生少宿儲却比蘇家  
多負郭長安陌上久離群予亦還山卧白雲南巖桂  
樹花自發歲晚相看一望君

雪中宴袁揮使惟武宅

四郊飛雪暗高城北風怒號天杳冥將軍宅中晝擊  
鼓哀箏鳴笛羅後庭我時凍吟在西野忽見將軍送  
書者開書讀罷喜即行邀我入門方下馬凝輝絢素

開簾櫳流風迴霰滿堂中青氈帳高雪不濕蘭燈夜  
照氍毹紅鄉家父子皆好客能留對雪歡今夕已看  
稱壽奉千金况復徵歌出雙躡梁園賓客多交遊謝  
家兄弟盡風流古人盛事長已矣吾輩優游亦爾傳

鴻門行

沛公昔日今義軍旌旗十萬西入秦山東諸侯皆後  
至咸陽萬姓思為臣項王東來怒如虎置酒朝會鴻  
門下門前壯士擁盾入座上小臣拔劍舞爭雄較勝  
未可量相看杯酒成倉皇揮刀醉擊玉斗碎攬帶空



九後集 卷十二  
懸寶玦光沙丘城邊祖龍死芒碭山傷匿天子澤中  
夜聞白蛇斷灞上朝看赤雲起君不見劉郎供帳出  
秦宮宮中火照三月紅英雄為謨自有術亞父徒知  
殺沛公

垓下行

咸陽原上失秦鹿戍夫入關競馳逐君王自負十尺  
軀傷人更訝重瞳目橫行按劍一何威叱咤四海隨  
指揮諸侯西向受金印壯士東歸盡錦衣陰陵道中  
夜失援垓下孤軍獨迎戰百萬王師來震天八千子

弟隨飛電自言百戰當一身寧知一敗損威神美人  
帳下看無主駿馬江邊棄與人楚歌聲高暮雲佇孤  
燈對酒慘不語蓋世英雄力拔山一夕悲哀淚如雨  
君不見三軍縞素行負戈烏江不渡愁風波古來失  
道衆所棄父老雖憐將奈何

長歌行贈旺兄

兄為吾祖之長孫能將孝義持家門耕鑿不隨時俗  
改衣冠頗有古風存我家東岡舊鄉土穀有田場桑  
有圃諸弟誼譁逐城市兄也蕭條守環堵僕僮馴雅



妻更良男女膝下皆成行女長適人止近里男大為  
農不出鄉只今汝年六十七我翁為拊汝為姪歲時  
相看如父子登堂過庭禮不失弟昔省兄盡兄懼夜  
秉燈燭羅杯盤兄前勸飲嫂勸餐留我一月相盤桓  
自從離兄仕都下都城誰是悠悠者萬戶清晨霜滿  
裘九衢白晝塵隨馬朱門金鎖午未開我曹不敢騎  
馬回此時吾兄正穩卧日高戶外無人催愛兄好靜  
謝塵網一卷道書常在掌托身未肯附年少舉手何  
曾揖官長頃來生事日看微種麻自織身上衣少兒  
從學長幹蠱我兄心中無是非君不見人間歲月坐  
相迫胡為東城復南陌兄今已作白頭翁弟亦長辭  
青瑣客山中桂樹况逢春谷口桃花更照人花前樹  
下一壺酒弟勸兄酬不畏貧

短歌行贈賈西谷

城西草堂日無事廣文先生騎馬至先生雅性嗜林  
壑為愛吾廬有幽意長溪風起寒日冥晚雲含白冬  
樹青山城沽酒不易得為爾且繫雙銀瓶先生好吟  
近頗酷手書佳句已盈軸燈前朗詠三十篇一一微



音中金玉顛予踈陋非良儔感君過野常優游城中  
 豈無萬戶侯金盤玉饌不必留從來富貴安足慕水  
 上浮漚草頭露君不見賈生自負洛陽才南遷且作  
 長沙傅

漢將篇

漢家西北烟塵起烽火夜照西京裏  
奔崩一作騰  
 一萬騎關塞逶迤五千里飛符插羽募精強連營列  
 陣掃邊疆已見將軍屯細柳更聞天子獵長楊長楊  
 羽獵兵威振疊鼓鳴鈺聞遠近龍帝遙今天上軍魚

蛇徧閱雲中陣長安驄馬俠少年金鞍玉轡鐵連錢  
 共看拔劍追驕子自許彎弓射左賢驚風晝起邊沙  
 漲踈勒黃雲迷所向飲馬寒臨月窟傷驅兵夜度天  
 山上降旗欵節樹戎城卷旆迴旌入帝京征人半死  
 龍庭戰壯士俱標麟閣名麟閣功名不易得貴臣良  
 相徒顏色威■盡道李飛將還漢誰言蘇屬國玉門  
 關外朔雲愁燕領書生白頭君王自憶廉頗葦義  
 士羞稱萬戶侯

孤鶴篇



我家孤鶴李侯贈霜儀皎潔三尺高向人似矜短羽  
翼失侶豈免長吁號赤霄青雲暮延佇天長路遠飛  
不去日來秋塘啄苦蓼時向空墻倚脩樹憶昔初在  
山人家雌雄和鳴閑且嘉夜寒對舞庭中月日暮雙  
棲嶺上霞李侯平生重幽德致此遠自東吳國金櫳  
玉檻脫相送異種竒毛惜不得一自天涯失舊行垂  
頭戢羽空徬徨朝聞橫笛音相和夕對鳴絃影自傷  
荒堦雨濕多泥滓毛翻摧頽風不起奮迅那推一鷄  
先昂藏且在群鷄裏吁嗟人世是還非華表千年更

一歸蓬萊宮內青搖樹會接文鵠比翼飛

冬雨嘆三首

季冬十日雨不絕寒烟凍霧何淒淒城頭無由見白  
日坂下祇是愁黃泥鄉中餓叟納官賦白頭赤脚行  
中路薄暮臨河望郡城水深岸滑何由渡

二

一冬枯槁雪不集細雨冥冥高岸濕天邊鴻鴈安所  
歸歲晚蛟龍不得蟄昨聞汝北多死亡橫尸委骨官  
道傷我里四鄰久已出到今不知死何鄉



三

西望千峯萬峯連出門朝暮生雲烟日傍雨脚下平地風外濤頭衝遠天急颺北迴振林薄白晝狐狸行近郭城下飢烏啄死人蒼鷹側來怒相攫

懷舊吟贈阮世隆

君家高樓對芳樹開宴曾留三日住銅槃絳蠟煖照春金壺銀漏寒催曙知君重義多豪游滿門賓客為我留珊瑚不避鐵如意驪駒皆經金絡頭爾時北上與君別蔡州城外花如雪夢裡猶尋汝上雲醉中却

憶淮西月丈夫富貴各有因如君立身亦不群行年四十未白髮生兒十八期青雲君從秋日遙分手我向東風一回首山下長寒舊薜蘿樓前應長春楊柳

官倉行

長棘周表三丈垣高門鐵鎖緘兩關黃鬚碧衫下殿吏白板朱書十行字帳前喧呼朝不休剪旌不隊聽唱籌富家得粟堆如邱大車檻檻服兩牛鄉間餓夫立墻下稍欲近前遭吏罵

除夕醉歌二首



大德集 卷十二  
今歲相逢惟此夕美人金罇莫虛擲千金一刻真可惜  
惜夜久衾帷望河漢寒星欲沒明燈爛長歌坐待東方旦

二  
孤城歲徂嘆幽獨舉觴醉飲城西曲野風蕭條山雪暮  
寒梅無花柳難綠今年今日不可留明日明年更可愁  
山中縱有如澠酒春花爛熳與誰遊

醉歌行贈荻逸士

今年中秋與君共舉觴待月城西宅良夜清尊逢故人  
空堂明燭留遠客山城暮雲黯未收流烟何時散  
高樓清風徐來勸我飲明月不至令人愁君是長安  
舊相識坐論舊事還相憶金市豪華如夢寐玉京仙  
侶無消息人生去住安有同有如長風吹斷蓬得隨  
江湖扁舟外不恨關山橫笛中酒中雲散天如洗月  
明忽墮金罇裏起看皓彩簇青巒坐見流光盈綠水  
澗舞高歌夜未央攬衣擊節為君起

和獻吉送公順

君不見池中魚君不見澤中蛇一朝羽翼起烟霧向



時頭角盤泥沙神物舒卷各有時男子豈得常在家  
君今年纔四十餘雙旗駟馬高蓋車手中持文符腰  
下佩輶轡登山采球琳涉水采珊瑚吁嗟至寶今豈  
無莫使和氏空號呼

古峯畫梅歌

空江月墮孤山曉直幹橫枝踈更好夜來夢破碧牕  
虛殘雪半庭寒不掃小橋水淺影初斜野徑風清香  
未老霜魂月魄獨俛俚玉骨冰肌自枯槁溪頭數點  
瘦花明塢雲漠漠林烟渺逋翁湖山詩思閑寐寐  
門春醉倒山亭晝午鶴飛還一聲長笛江門悄

登山吟

風吹葛蔓石磊磊蘿薜搖烟映山鬼我行登山采石  
耳長歌捎林暮風起君不見寺傷桃李飛如霰青春  
已破白日宴萬事盡付東流波高飛且嘆南來鴈

落花嘆

君不見樹上花東風吹始開東風吹開更吹落世間  
有樂寧無哀汝南何生未三十頭髮未白心已灰見  
此落花三嘆息東風吹去何時來



復見阮生行

阮生別我尚總角三月不見冠  
我未知華實竟何似  
眼者玉樹成枝柯  
君不見世間日月翻如波  
昨日黑髮今則皤  
龍駒千里汗成血  
道傷老馬空蹉跎  
人生少時不努力  
齒大身長嗟奈何

古井篇

君不見城邊古井荆棘荒  
沙崩雨塌官道傷  
當時碧甃映朱閣  
黃金闌干銀作床  
美人銅瓶響哀玉  
寧知委棄同悲涼  
梧桐花乾蘚花滋  
鷺鷥側窺蚯蚓入百

丈寒泉尚堪飲  
心長綆短空愁立

古松歌

賢隱寺傷之古松奇絕可比徂徠  
峯問之故老迷歲月但見皮肉屈  
彊苔蘚裂高枝上掣元冥風迴柯  
反掃陰崖雪藤翻蔓卷空林黑集  
霰流烟豈終極斧斤相顧畏盤錯  
梁棟誰來誇正直昔予山遊駐車  
馬行吟屢憇茲松下松根老僧為  
開徑野色巖姿坐生暝葉暗秋燈  
梵殿深花香晚飯齋廚靜一年幽  
憂不到此寧知摧折空山裏龍盤  
席拏終有神白骨蒼鱗半



六後集 卷十二  
枯死滄波古岸霜氣夕砵砢猶看數千尺石上連朝  
走雲雨山中十月飛霹靂千靈百怪相護訶過客居  
人盡憐惜君不見泰山五大夫零落今看何處滄  
海空流使者槎悲風暮起將軍樹嗚呼人生富貴竟  
何益松乎松乎吾當為爾誅茅傍青壁

隴右行送徐少叅

隴右地長安西行一千里秦日長城號塞垣漢時故  
郡稱天水 聖朝掃盪無烽烟射獵之地為桑田熟  
羗賣馬常入塞將軍遊騎不出邊知君風采古遺愛

揚策傳符度關內父老三秦望節來

遮馬

拜開藩分道鎮邊塵居守巡行歷幾春熊軾朱幡今  
岳伯豸冠白華舊臺臣瓦亭之西半山山谷土室陰  
連板屋落月孤城清渭源寒雲古磧黃河曲十年此  
地曾遊歌別來風物今如何竹花秋臨鳥鼠穴楊葉  
夕渡魚龍波回看萬里風雲色少小趨庭淚沾臆相  
送悲吟不盡情關山隴坂高無極

遊西峯示四子

今我不樂遊西峯喜有四子來相從日長古寺風景



靜蜀葵始青榴始紅彭生舊時同遊者每遇遊山先  
跨馬徐生愛山欲留宿朝見青山獨開目白云邑城  
盡原野頗恨無家傷林谷陳阮二生皆少年陳生家  
亦近此山阮生志不在山水騎馬欲行仍復還吁嗟  
汝輩各努力此身會見生羽翼乘風高舉或遠遊安  
得久為山人留他時倘願騎黃鵠隨我江邊伴白鷗

甄邦治行樂圖

黃金雖有餘不如常乘下澤車紫綬結腰下不如常  
騎款段馬人生富貴皆有憂豈必只願封公侯君今  
出有駿馬更輕裘及此壯年當出遊西飛日月如東  
流君不見馬少游

長安大道行

長安大道如弦直車馬相逢不相識金鞭玉轂共爭  
先日日紅塵大道邊七貴門前羅將相五侯座上列  
神仙五侯七貴同杯酒萬騎千夫盡奔走一言得意  
賤可貴百計奉身無亦有益酒經過日共遊比權並  
勢暗相謀才見黃金結兄弟忽看白刃起仇讐薰天  
灼地期長久覆雨翻雲亦隨手富貴誰言福作門驕



奢終與禍為隣，瑤臺歌舞新。更主金谷池，亭別與人。  
豪賓貴客如風散，鞍馬當時倏雷電。得飽空聞鞞上  
鷹，附炎不見梁間燕。尋常只道泰山安，項刻寧知滄  
海變。秋來春去互推遷，物理相尋是等閒。豈知盛滿  
衰，仍至豈識憂。從樂極還獨怪，梁生何感慨。拂袖長  
歌辭漢關。

入京篇

以下京集

軒車若水流，宮闕似雲浮。畿甸一千里，山河十二州。  
城中甲第共崔魏，別起雲霓接露臺。旭日纔臨萬戶  
動，飛塵遙見九關開。九關雞鳴競車馬，百僚已集金  
門下。入衛皆為龍虎軍，來朝盡是貂蟬者。天子乘  
春覽物華，霓旌羽扇五雲車。六龍不駐千官仗，匹騎  
常過七貴家。七貴家連鳳城裏，轉日薰天勢無比。池  
榭春來錦繡圍，樓臺日暮歌鐘起。復有蒙恩過董仇，  
執柄持權得自由。不使府中除將相，直教門下謁王  
侯。王侯貴人慕豪富，意氣相看益驕妬。未惜朱閑騷  
裏駒，豈論金谷珊瑚樹。托身日月有光輝，舉翼風雲  
多會遇。可憐漢室盛衣冠，楊雄蓬巷獨飢寒。終歲校



書空閉閣十年執戟不遷官公孫射策取卿相李廣  
馮唐徒自嘆

送熊廷振之楚藩

燕京春色花太半豫州楊柳風吹斷南鴈新衝汝雪  
來北車久待河水泮與君結綬俱明時送君執手  
如前期丈夫勲業豈必少四十遭逢猶不遲即今君  
身更磊落義氣如山誰可奪同楊衣冠照鄉里十年  
名位登方岳帝城朝開羅旆旌欲發未發明星明  
麒麟獻納遙相憶江漢風流湏此行

送顧錦衣赴廣東僉憲

君不見錦衣白馬若雷電當朝氣勢人爭羨顧君出  
入身不移心看富貴同貧賤二三貴人隨至尊冠冕  
劍佩如雲屯青袍自向將軍幕款段不叩諸侯門外  
臺新捧廣州檄青冥斧鉞生霜日海嶠諸城簇鼓迎  
江天萬里褰帷出丈夫不言自立身清水白石何鄰  
鄰金張門客不足數巍巍赫赫何為人

送樊生

翩翩南園鳥昔是北溟鯤纔見搏風一日起忽看垂



翹九天雲樊生此行覽吳越大江石城通日月峇峇  
南京十二樓波浪蹴踏金銀闕爾上金陵望帝關星  
河北極開幽燕丈夫常懷四海志才人心賦兩都篇  
排空萬里有毛質再接扶搖上九天

彭生行

岷峨山根江水坼萬里波濤混吳越傾湖倒海不可  
量仰看一線青天上鬱藍秀色盤三巴間產錦石兼  
丹砂王嚴楊馬各挺出異才豈必生中華彭生昂昂  
千里駒少年騎馬來成都飛黃驪裏未即試已覺竒

氣拚長途君不見岷山不崩江不枯古之英才何代  
無

黃河篇

黃河崑崙源九曲與天通銀漢貫箕尾左盤日月宮  
奔流下龍門噴薄沙海風三山萬里倚窮髮鰲極虹  
梁開恍惚排空雪灑垂銀城便可因之向溟渤郭生  
少年觀上都還家且泛黃河艫讀書豈必破萬卷覽  
勝何須行九區蓬池已在梁園裏嘯歌綠水洪波起  
揚帆他日乘高秋見爾星槎掛斗牛



三清山人歌

山人佩劍冠遠遊腰間鞶囊垂虎頭七星照耀金銀  
鈎東行策杖指盧霍逝將滄海尋丹邱三清西南龍  
虎連攢峯疊翠盤石蓮千崖萬壑不可以徑度玉梁  
倒掛銀河前青蛻下望憑雲烟石壁中開日月懸傷  
通七十二福地白玉樓臺羅洞天此中棲身煉大藥  
寶笈靈書啟五岳騎鹿時見南斗君聞笙夜候緱山  
鶴我今遊目送冥鴻欲訪名山入越中飛梁萬丈倘  
可接共爾青天躡彩虹

昔遊篇

三星爛夜河漢流觴行瑟作中堂幽李君勿嘆息薛  
君且停謳英英孟夫子聽我當筵歌昔遊昔遊少年  
觀上都並轡驕嘶雙紫駟雲中十二樓羅綺照燕州  
夾槐複道臨仙苑垂柳通闌對御溝平明向帝宅半  
醉過王侯遊梁詞賦那稱數入洛聲名未足儔自言  
與我共聯翩塌翼寧知落九天折花別青門揮袂渡  
湘川班竹古魂垂淚雨蒼梧遙夢結愁烟南嶺越江  
坳東城移海郊不記流年幾拋擲五見楊柳垂青梢



鴻鴈散他縣鷓鴣棲故巢君從岐路悲轉蓬我在長  
安嗟繫匏金門上書久不報雲閣題詩空自嘲以茲  
守蹉跎舊客罕經過日與李薛輩詩酒縱歡歌春風  
宛轉青絲鞵夜月留連金叵羅筆翻翠虹霓手掣生  
蛟鬣三千豔女羅紕宮傾城一笑揚雙蛾星分霧散  
去長安豈意天垂雲雨懽龍劍雄雌忽復合朝天再  
覩漢衣冠帝京宮觀一如昔盤龍曲鳳青雲間九衢  
車馬流如水五侯甲第峙如山星樞常不轉海岳自  
迴環昔日繡衣一何貴今看竄逐宰河關可憐舊賓

友逝者誰復還二三壯士力搏虎轉盼埋骨黃泉灣  
榮華閃爍若電露俯仰今古凋朱顏君不見漢李廣  
威名萬里匈奴聞彎弓貫白石射虎生黃雲一朝謝  
病逢醉尉灞亭不識故將軍君不見秦范雎折脅摺  
齒隨王稽一言奪相印七國趨關西雄豪趙魏二公  
子徒使虞卿從魏齊貴賤傾覆如旋風王侯豈異鳥  
與虫魯連獨蹈滄海去張良仍從黃石公孟夫子摠  
角與君戲共許非凡倫萬金驥褭騰天雲子今胡為  
在風塵低頭覩面男子身笑予落魄亦如此痛飲狂



九後集 卷一 二  
歌非隱淪回首向崧岳少室高嶙峋寂寥紫芝曲空  
負挑花春會須約爾同歸去為招李薛兩才人

贈商三

去冬雪雨留薊門開筵謔浪倒金罇今春燈火到長  
安過門不肯迴銀鞍燕山花隔平山柳馬上東風幾  
回首

大梁吟送李進士

大梁擅豪華鉅野生龍蛇頃來曹李輩擢秀冠詩家  
神駒並逐兩超絕九馬百萬空咨嗟李邕門下多奇

士曹是賢甥李高第登龍自昔忝通家附驥相看摠  
名世梁王臺館嚴歌鐘兎園賓客有遺踪侯嬴舊隱  
夷門里孛渤今歸少室峯回望嵩高瞻岳首即尋元  
圃問河宗可憐二子詩家秀吾生已愧盧王後司馬  
黃金賦未逢揚雄白首書空就李當春日別燕川曹  
也誦詩神黯然蓬池更憶阮公嘯腸斷洪波綠水篇  
東海太守行贈徐以敬

西曹大夫東海太守且停爾車飲我酒二十讀書飽  
經術腰下組綬無一尺一朝天子賜五馬十年官



大復集 卷十二  
至二千石漢家盜賊滿山東十城九城荆杞中王食  
常懷股肱郡蒼生久慕循良風况君兄弟皆甲第出  
入光輝無與比兄飛仙為宰 王畿弟握侯符長干  
里四世五公自此始不見關西楊伯起

何大復先生集卷十二

何大復先生集卷十三

七言歌行三十六首

石齋歌

濯錦江中錦為水白石粼粼映江底江頭齋閣石嵯  
峨卜築題名總因此嵯撐壑拄盤天地產秀生神豈  
人意日月宵通灑瀨根風雲晝吐岷峨氣明公少年  
天下奇琅玕五色動光輝扶踈太華仙人掌照耀銀



河織女機明堂大厦要梁棟不獨文章翰林重懸磬  
真諧韶濩音國琛果獻珪璋用公登雲閣望雲林霄  
漠長歌白石吟功成思袖補天手力在寧忘漳海心  
衛公德業懷應滿李相風流今不遠海內完名已至  
成平生貞志同金斷萬里橋邊綠竹園百花潭畔平  
泉館待公一起慰蒼生還卧西山未應晚

五馬行

使君五馬來月氏方瞳夾鏡光離離長身峻耳高七  
尺錦雲罕地玉花赤杏韉盛鐙雙盤龍文羈翠刺金

玲瓏青絲遊韁縮不住鐵色蹄翻錦苔地天閑紗苑  
貯幾時一朝分賜使君騎使君行春常露冕緩鞚張  
油下山縣朱文露網動輕車四野人家望通憶去年  
來時楚江秋長鞭馳過黃鶴樓楚城駿馬千萬匹解  
鞍坐視不敢儔今年朝天入五鳳紅纓寶玦連錢重  
曉隨鸞聲撼玉珂九陌風微塵不動天子命下巡  
吾州輝光重整金絡頭吁嗟吾州本狹促迤徑寧當  
千里足行行前駕肅且閑鄙人遙望雙旌竿馳道父  
老應開顏區區狐豕誰敢前桑條吐葉青鬱鬱滿路



春塵繞車轂使君不惜驅馳勞無令暴吏登民屋出  
門一送五馬行我馬踟躕皆不鳴相逢同是他鄉客  
惆悵城邊暮春別山亭草色細雨時野館梨花寒食  
節夕陽微微鄴城樹寒烟漠漠淮川月願言努力策  
霜蹄千金重有登臺期

憶昔行

我年十一十二餘與子握手相懽娛嚴君視我猶視  
子日向庭前問詩禮我亦視君如弟兄夜入同衾晝  
同起當時見子已不辭紅顏如玉目有神花邊燦燦

丹鳳雛天上矯矯石麒麟笑予是時尚垂髫把筆從  
君弄文翰聯翩白馬控雙御出入城中誰不看我當  
辭歸君失懽徘徊欲別良獨難別來有懷徒悵望夢  
繞秋風沁水寒杳杳雲鴻異鄉縣十載長安見君面  
昔別未冠今已婚回憶少年空嘆羨一官碌碌經三  
春二十光陰似飛電君有長才未得施卧龍儀鳳猶  
棲邊男兒成名在少壯感會風雲須及時人生聚會  
豈常有但願相知不相負君不見古來金石交結髮  
寸心期白首



崔生行 并序

子之至京師也友人崔太史子鍾見之曰久不聞何子言矣為我作崔生行

崔生自返金陵謫騎馬復走長安陌時危頗負經濟才海內俱一作但識文章客自從盜賊近神京四海不見烟沙清黃河流血日慘怛中原戰骨霜縱橫朔方兵馬又已弱天下財賦難盡權書生不得言世務大臣誰有匡時畧我到長安訪交友子與河內猶相厚感君戀故有緜袍吐膽傾心共杯酒六年更見元都

花萬事空傷薊門柳河內憂時未解頰子亦談兵不輟口金礦玉璞隱光曜紫氣龍泉鬱盤久議論反遭時輩忌形容豈免流俗醜王良伯樂不在御驂騮騾褻徒能走人言古人未可輕古人往往皆無成子雲老大不曉事殷浩當時空有名事去惟應嗟白首時來未必濟蒼生即今風塵尚瀕洞羽檄飛符遞相送西北山河戰角悲東南天地軍麾動江海未見魯連耻朝廷不聞賈生慟塵埃早知才質殊霄漢况覩名聲重闕宮清廟待琴瑟大厦明堂要梁棟天生公



大後集 卷十三 四  
等世所須努力他時有大用

憶昔行 并序

予上京師之二年汝正有湖南之行新政弛廢故人幾何晤語未諧離告又即愴然悲歌不能自己感念往昔要之將來耳

憶昔長安相會日君方壯年我年小只今容顏有更變何況世事無紛擾先帝衣冠半零落十年賓友全稀少君今始作紫微臣笑我金門落魄人馮唐上書亦嘆老子雲識字空愁貧艷陽三月桃李耀君非

壯年我非少花開酒熟君遠行可惜春風阻懽笑明星迢迢車關關遙向楚水辭燕山但看朱紱在腰下莫使白髮生顛間武昌城邊江色澱襄陽漢水允堪羨東行何日訪鱸魚南飛不得隨鴻鴈少癡山水耽雲松兩年楚上多行蹤浮湘直下三千里望岳遙瞻七十峯知君跌宕輕駟馬顧予豈是功名者安得浮沉帝座傍會須覽眺蒼梧野蒼梧風烟秋色開武昌高樓吹笛哀帝乘白雲去不返仙人黃鶴何時來君行訪古兼化俗長楫輶軒指南極岸上游穿羆席



林潭中坐傷龜鼉國他時倘覓桃花源北風為爾傳消息

田子行

君不見黃河西來北入海千載却倒東南流淮水如  
絲納九曲桐栢山作崑崙丘我家清淮邊君家大河  
側開闢二水今合同人生變化無南北田子之生河  
降神十五手掣生麒麟二十辭家觀國賓三十謁帝  
為近臣赤瑋青瑣日月上金馬銀臺河漢津自矜一  
身遇明主便欲登天叩天鼓天門晝關守虎豹雲師

屏翳雷公怒烟氣縹緲隨飛龍電光閃爍笑玉女太  
清星辰下羅列歛忽閭闔生風雨丹誠不回白日照  
杞國憂天獨勞苦我持彤管雙鳳翎浮沉 帝傷近  
紫庭文園著書久消渴據地酣歌常不醒長安少女  
花在側茂陵美妾空娉婷漢王不好相如賦方朔誰  
知是歲星愛君襟期特奇邁諫垣給舍持風采平生  
古今開萬卷搖筆風雲動五彩致君堯舜豈無術許  
身稷高終難改袖中一扎諫獵書三歲磨滅未見採  
鍊石何時更補天銜沙枉自思填海君不見楚人當



時不識王海客無心采明月明珠暗投反按劍白璧  
三獻還遭刑連城高價後始定照乘奇光有時發鳳  
凰不及鷓鴣鳴駑駘却笑驂騑拙君不見長孺從來  
歎積薪公孫布衣為漢臣千秋開口取卿相董生白  
頭甘賤貧萬言不如一言重直絃曲鈎安可論賈生  
何能善絳灌任安徒事衛將軍我今與子俱落魄過  
飲悲歌慨今昔咸陽酒客五花馬邯鄲博徒千金擲  
古來豪俠亦可喜可憐聖賢皆厄塞豫章干雲世希  
用龍泉貫斗人難識神駿翻為轅下駒冥鴻已愧籠

中翼出門與子常相憶清淮大河見顏色

樂陵令行

山東郡縣一百八無有一城無戰場到今漂血成野  
水如山白骨橫秋霜雲臺功高將不收投筆亦有書  
生謀黃金大印賜豪貴白面豈得言封侯唐朝公卿  
集如雲平原太守名不聞二十四城見賊走抗城乃  
是平原守君不見前者寇盜時縣吏州官各亡命北  
梁白馬終日行濟上黃旗錯相映不聞開門戰但聞  
開門迎嗟乎平原太守樂陵令



少谷子行

少谷子在武夷之山二十抱策叩燕關朝排閭闔暮  
湖海九霄萬里身翻攀豈徒聲名冠帝里要使踪跡  
窮人寰竭來京華始一識意氣形神兩相得肺腑真  
成水石痼詞章亦帶烟霞色龍姿鶴性不易馴海思  
江情浩無極頃將東遊觀岱宗便欲下泛滄溟中鼉  
風奔浪巖洞黑鰲日壓山樓觀紅南浮江淮覽吳越  
復上會稽探禹穴去鳥晴生鴈宕雲飛虹夜躡天台  
雪波濤窈渺岑岵移遍訪名山入武夷仗劍不憂百

怪出采芝或得群仙隨只今妙年始三十辭官讀書  
志何逸九曲烟花對草堂三山蘿月開芸室已看鳳  
凰在千仞回首驂騑空萬匹八月高城氣稍勁流螢  
木葉交相映燕山遊子落日吟海濱歸客秋風與他  
日遙尋少谷峯武夷莫作終南徑

九川行

君不見自從天地開天下之水皆西來黃河崑崙一  
線出下轉秦甸轟奔雷長江廣漢兩盪潏濁涇清渭  
中縈迴帝遣九龍下治此江漢安流涇渭理華嶽中



斷仙掌高却放黃河行萬里九龍蜿蜒上天去至今  
猶餘九川水秦中雲雨四時遍  
來長安不見九川水得見九川子九川子是常人  
朝辭川上麋鹿群夕登青瑣為帝臣已從華袞補  
日月况執彤管排風雲長風西來吹北極西望川流  
渺何極野岸空懸舟楫心塞林暮繞波濤色吁嗟江  
漢猶阻兵中原不見黃河清虺蛇豺虎滿道路黃埃  
濁浪無人行九川子何不更鞭九龍起坐視天下橫  
沅水

送葉生還閩中兼懷鄭繼之

葉生行吟燕市中葛巾麻鞋歲將晚兩都為客今始  
歸五岳尋仙不辭遠江南畫舸春柳低海上茅堂白  
雲滿谷口如逢鄭子真為道棲遲未應返

送林利正同知之潮陽

憶在成均共携手泉山門下相知久萬里恩情若父  
兄十年道義慚師友君才豈孤一第名佩刀今作嶺  
南行掛帆夜宿天邊樹伐鼓朝登海上城燕京相逢  
顏色好相逢何難別草草過家登堂壽禮畢道子問



訊泉山老

金陵歌送李先生

李公為舅有呂甥舅四海皆知名呂君關西昨日  
去公自金陵來復行金陵江水無斷絕金陵之山高  
巖巖龍虎千年抱 帝京星辰萬里羅天闕白鷺洲  
前芳草歇清江浦上看明月燕山北望花如雪

今昔行送何燕泉

君不見燕泉何子生南岳十八名聲動江海年今四  
十少方伯富貴由來重文采金章紫綬乃自致黑髮

紅顏未曾改憶初射策逢 先皇我為進士子為郎  
芳花醉踏清沙苑春樹迎開畫省堂每投桃李報瓊  
玖多謝相知更相厚倚玉元非異姓况斷金况是同  
心友寧知世事多變更岐路人間各分手四海風塵  
半甲兵十年意氣還杯酒子方出守紫薇垣子亦棲  
遲金馬門黃金盡識故交態白髮翻思 王恩中  
原送別哀離亂汝水嵩川客心斷行馬秋臨清洛流  
戰場暮弔黃河岸薊桑青青燕草碧梁王城邊杏花  
白功勲名位行有期慷慨為子歌今昔



同崔子送劉以正還關中

燕川芳草歇已久行子西行更回首駿馬春停渭曲  
 花金鞭暮指秦中柳看君兄弟皆英雄十年側想中  
 丞公東山雲月卧未起北海賓客誰相通荷花初紅  
 酒初碧汝歸登堂見顏色若問長安舊友生崔何二  
 子常相憶

醉歌贈子容使湖南便道歸省兼訊獻吉

徐卿此行壯觀莫與伍東將入吳西入楚都門悵飲  
 慨今昔酒酣拔劍為汝歌起舞 聖朝分封重茅土

詞林禮樂超前古冠冕諸邦拱 至尊冊書十道開

天府匡廬峰南繞江漢洞庭武昌半樓觀壽酒花開  
 海上堂使舟草滿湘西岸憶卿翻飛霄漢裏結交豈  
 少青雲士眼中何人最知己十年之交吾與李李生  
 近買陽羨田又欲鼓柁襄江船風塵落日倘相遇為  
 我問訊江湖前

薛生行

君不見少府忘年交彌衡中郎倒屣迎王粲坐間賓  
 客盡傾倒海內賢豪流英盼古人愛才今不如薛生



豈得無嗟嘆昨來布衣見 天子日向長安乘欵段  
公卿門前恥干謁東歸把釣黃河岸年少今看萬卷  
閒遠遊自負三山願丈夫有才須用世未許終身隨  
草蔓閑居好著子虛篇行路長歌白石爛

晚過田水南有贈

田郎閉門著書今幾卷我欲與子數相見謔浪雖稱  
青瑣賢經過罕識黃門面長安雨積鞍馬稀堂下苔  
生集秋燕四海何人問草元一經徒使桓譚羨

延津歌送韓令

延津寇過餘少男延津縣令莫停驂雙鳧直向黃河  
北一鴈先飛清衛南黃河岸邊不種麥濁浪滔天多  
賈客城中少男爾勿愁縣令到時為買牛

谷進士宴歸圖歌

五城十樓春窈窕九衢夜半人行少月高醉客金鞭  
垂花簇銀鞍弄驥裊我 皇九載羅豪英坐收四百  
皆才名四百人中見谷生綠袍白面誰不驚谷生自  
昔中州士布衣三來謁 天子十年讀書梁王臺一  
日走馬長安市長安鍾鼓聲入雲相逢却避新郎君



赤鯤在天振羽翼神駿得路超凡群嗚呼此圖人共  
羨已識君身不貧賤萬言莫忘北闕書千載常記南  
宮宴嗚呼此圖人共羨

遠遊篇送楊中舍承家雲南省墓

君不見昆明池去京一萬里山盤海曲在天上日轉  
星旋羅地底生神發秀千百年太宰源流自茲始七  
歲辭家朝 帝京登台踐斗榮身名水木更起丘原  
情請 帝帝遣中書行中書此行 天子重赤車  
馬都人送岳樓畫錦湖光開京口春帆江色動瀟湘

鼉鼉經水國衡巫瘴癘雲來黑銅柱標南問南紀錦  
官城西指西域揮毫憑軾驚蠻夷却似太宰中書時  
相如使蜀人同羨遷史浮湘志自竒憶昔滇中為使  
者黔公宴我滇山下酒罷曾變壯士弓賦成尚倚將  
軍馬今日看君萬里歸山川草木倍光輝公卿禮數  
古來少父子聲名天下稀五華岡頭日朝放點蒼山  
北雲如障遠遊可樂須早還 帝里親闈兩相望

裕州行

今年春夏雨不絕黃河以南漸殺麥裕州城中十萬



家自經寇盜惟黃沙名商大賈歲不集新絲舊穀嗟  
何及郝侯五馬天上来褰帷露冕開風霾教農服田  
賈服賈只有牛馬無豺虎

石川子歌

石川之水東流入東海濤雷瀨雪幾盪啣白石爛爛  
色不改泰山嗟我青石室樓閣窈窕雲霧密懸峰脰  
瀟瞰海底紅輪倒影扶桑日波上三山渺安在海靈  
冥冥現百怪蛟螭九首盤為梁神仙萬古長相待石  
川子七年葺茅卧烟島餐藜被褐身懷寶海東隱淪

見面難地北潛夫著書早自從召起綰銀章常夢山  
中把瑶草白雨青蘿畫自垂沙風赤葉秋空掃京華

相遇謫

一作識

仙才笑解金龜沾綠醅花邊昔放雙鳧

去雲裏今騎一鶴來蔣琬元知非百里李渤終為諫  
官起冥鴻逝鵠須爾期天路雲衢自茲始君不見魯  
門海鳥本避災國人祀之反求福雖有鍾鼓羅玉饌  
驚鳴駭顧安能食男兒固要為龍蛇胡為屈身終日  
隨塵沙

杏林曲



君不見蕭御醫何年種杏成杏林霞蒸日爛開芳甸  
門庭垂實虎晝守飛花九陌人人羨菊泉橋井俱仙  
靈豈知萬樹春風散 今皇御醫皆不賤麒麟緋袍  
常引見奉 詔時翻本草經承恩數錫仙桃宴君今  
一身官未尊白頭抱藝趨金門輕財重義世罕比起  
死回生不自論林中有草金光映服食可以延壽命  
蕭君蕭君進此藥令我 皇帝萬歲無疾病

周儀賓朝天歌

周君來從大梁發搖鞭却指秦樓月燕山臘盡春未

生可憐裘馬衝霜雪憶昨雲霄謁帝闕春卿引見紫  
宸班天門九重羅虎豹一月不得朝龍顏館甥帝室  
恩數少尚女王家禮非小中山更傳聞樂對陳王六  
進通親表伊昔梁王全盛時車騎從官皆漢儀遣使  
常聞八珍送入朝數賜飛龍騎百餘年間事勢殊諸  
侯出或乘驢車朱門賓從想冠劍白頭王孫行路衢  
君歸為我一問訊梁園賦客今何如

送五清先生赴浙江提學歌

天台文宿衝紫霄先生奉勅馳星軺越山桃李花萬



樹春色早渡錢塘潮憶昨先生遭斥逐漂泊湖湘望  
巴蜀九江鴻鴈春冥冥七澤龍蛇畫盤曲洞庭天高  
急霜霰冰河雪岸開燕甸北來驄馬一日聞傾都走  
識先生面十年卜築楚村墟萬里今瞻漢宮殿當朝  
門生貴不少 先皇學士人猶見金門誰留供奉班  
銀魚舊錫恩榮宴長安春回獨回首翠煙漸入龍池  
小薊門禹穴自此分送餞先生百壺酒丈夫輾軻心  
不疑賢聖流離古來有已看身作指南車况復名高  
懸北斗隋珠和璧世珍重眼前點毀終難動聖人不  
久奏雲門海內近亦求梁棟琴瑟湏聆清廟音豫章  
且待明堂用我聞衡嶽與天參七十二峯江漢南不  
然從此可棲息無使天柱石鼓空巉巖

贈范君

桂陽之山石巉巖四時雲氣流杉松江開秀色蟠三  
楚天削芙蓉羅七峯翩翩烟霧下鳳鷲往往霹靂隨  
蛟龍鍾竒產異理亦有黃金丹砂間瓊玖何況人傑  
非地靈碩士名儒映先後君山燕泉各一時晚逢范  
君亦其偶范君古貌更好古問之君山乃其祖學海



遥聞前輩風辭場獨覺良工苦君為進士宰江縣頗  
厭簿書耽筆硯神龍未應困泥滓驂騑會自追風電  
君山十年絕相見見君如見君山面燕京四月花滿  
甸邂逅不得同遊宴花間送爾雙鳧翔廬山高橫  
玉梁雲停鴈過一回首月明琴靜誰舉觴我自辭家  
來帝鄉宿賓舊友稀登堂悵望南邦思桂陽感今道  
故增悲傷

相逢行贈孫從一

長安風吹萬楊柳與君走馬相逢又明朝邂逅尊酒  
間二十年来一回首我官十年前君官十年後眼底  
相看已壯齡世間萬事真翻手憶初少小來東曹君  
家兄弟同遊遨尚書庭前兩玉樹白日燦爛秋風高  
爾時見君氣已豪花顏雲髮青錦袍石麟在天動鱗  
甲赤鳳排雲生羽毛只今骨格殊恒調傾都見者嗟  
英妙恨不置之玉堂賓誰令久待金門詔永嘉山水  
稱絕竒且與謝客同襟期花裏開簾仙吏出松間著  
屐山人隨尚書風義古無比如君更是尚書子尚書  
東山閒白雲高卧不為蒼生起漢庭我亦東方生悵



望名山無限情海雲浩歌起春色送爾萬里東南行

李大夫行

君不見大梁李進士年未三十官大夫金鍾翠釜識  
國器汗血飛黃看過都昨來走馬長安道一日聲名  
盡傾倒墨卿學士競迎致搖筆登壇為揮掃盧前王  
後不足論曹劉沈謝升堂早我方避世金門前君獨  
時時問草元金聲一擲天台賦鳳沼常留春草篇憶  
年二十當弱冠結交四海皆豪彥文章天上借吹噓  
杯酒人中迴顧盼十年流落失邊李詞場寂寞希篇

翰自從去歲得李薛令我倡嘆增顏色對坐相看兩  
鳳毛破圍實藉千軍力安陽崔史文絕倫意氣頗與  
二子親蘇臺徐卿愛才者曲巷往往停車輪斯文在  
天未墜地我輩努力追前人波頽瀾倒挽一髮鯨翻  
鼉擲爭嶙峋薛生歸釣黃河岸君心遙維沔川纜霄  
漢終還五馬車江湖暫解雙龍劍古來丈夫或未偶  
畏途轆軻無不有李廣羞過灞上亭賈生愁醉長沙  
酒倘遇馮唐老見君一言更薦雲中守

海山謠壽李宗伯



一鶴東北飛徘徊若返顧仙人乘之海外采衣裳窈  
窕流雲霧碧海三山列仙圃貝宮嗟我羅萬牖上臨  
紫極躡三台下見瑤京開北斗于簇玉織龍虎文再  
拜遠為尚書壽尚書巖巖霍岳姿身長八尺揚脩眉  
夜懸赤鳥星衣側晝入銀臺獻納司 先皇舊臣盡  
雲卧爾時出入名聲播二十餘年列九卿近日新銜  
叅八座海內清心祇獨知當朝苦節誰人過海門波  
濤春吐吞中有樛樹盤石根千年柯幹撐日月萬里  
枝葉垂崑崙觀圖願君壽與比長為梁棟留乾坤

河嵩篇壽張母

梁王古城河水頭北堂坐對嵩山丘雲間二室三花  
樹天上崑崙九曲流絳霄寶婺光射地星宿潛通河  
岳氣緘書爛熳歌白雲長安遠附青鸞使

古愚翁挽詞

古龍啾啾啼劍井井底秋泉七星冷漪蘭堂上瑟不  
鳴悽調空懷金石聲劍亦不復得瑟亦不復聞悠悠  
何處尋封君何處尋封君林壑幽魂風雨黑錫山崔  
嵬暮峯影吳江慘澹秋波色江之南山之北松梧幾



大復集 卷十三  
樹封君宅來往徘徊嘆行客

哭幼女行

二十生男不解愛頗厭世間兒子態年來抱女心甚  
憐却悔從前空慷慨女生一歲眉目揚笑指兄姊羅  
成行鏡裏嬌啼映牕牖床前學步牽衣裳春風吹魂  
魂不住來從何來去何去錦褕曾占夢月時玉錢又  
哭埋香處乾坤得失安有憑昨日樂極今哀生常怪  
他人不快意乃知我輩真鍾情皇天能生不能死造  
物弄人每如此雲散雲凝亦偶然花開花謝緣何事

婦人性癡還過傷奔走叫號如病狂作詩示妻兼自  
解轉見人間父母腸

馮都督歌

都督猛氣世不多一日百戰千里過賊頭繫繫十馬  
馱東至滄海南黃河宋門西平傳凱歌洛水轉鬪風  
揚波虜營晝雨淋湯沱面貫雙箭猶揮戈君不見諸  
將歸來金滿室生封萬戶食千邑都督河頭死為伯

三山春宴圖歌

自有三山鎮京口形勢跨絕東南山江吞海吐互變



大後集 卷十三  
見參天峙地何噴吭憑風倒影萬樓閣動搖縹緲虛  
無間色開島上金銀闕氣接天中龍虎關我從唐翁  
畫圖見大夫指點三山宴仙人驟鸞倏來往烟鬟霧  
珮流雲霰江桃千春一放花海桑亘古終難變開圖  
為寫長生詞却訝丹青山水竒白浪閃灼金芙蓉青  
天靜拭青琉璃蓬萊下用六鰲戴緱嶺遙將雙鳳騎  
地靈生人本非偶禱尼降嶽理亦有大夫家住三山  
口綵衣歸來奉翁母願言壽比三山久

王都諫畫鷹歌

竊生畫鷹筆勢何昂藏塞林海障產真骨歟爾飛立  
都諫之高堂千年古色動崖壑一匹素練開風霜都  
諫常稱蔣生筆此鷹神駿果無匹乍見遙驚俊思生  
細觀轉覺竒姿出人間鷲鳥各異種紛紛搏擊相矜  
寵飽颺飢附更誰憑掣臂翻鞞空自勇此鷹不逐群  
鷹飛亦似都諫獨立霄漢當天闈羽毛森然振赤日  
意氣矯欲排翔雲君不見郊原白日荆棘簇射獵無  
人敢馳突樹裏鷓鴣尚九霄草中狐兔仍三窟爾鷹  
爾鷹安得一起乘高秋惡鳥不鳴獸辟易再使郊原



麟鳳遊

題袁惟武鷹熊圖

林良畫筆真絕倫蒼鷹元熊俱有神白頭翁鳥更相  
共毛羽遙看欲飛動空山古林霜色高秋天骨勢何  
其豪猛氣應知萬鳥避威風頓使群狸號畫史當年  
元有意袁君意氣還相似執節寧辭皓首心承家况  
是青雲器圖龍寫鳳皆可羞此幅未許于金酬世間  
玩物不足貴要見英雄到白頭

何大復先生集卷十三



